

Pampango - Babaing Kasulatan - Wives Scriptures

Efeso 5:22-24 Ikayung babai, pasakup kayu karing sarili yung asawa antimo ing pamipasakup yu king Ginu. 23 Uling ing lalaki ya ing buntuk na ning asawa na, antimo i Cristo ya ing buntuk ning iglesia a katawan na. At ya naman ing Talapagligtas na. 24 Nung makananu neng sasakupan Cristo ing iglesia, makanyan munaman ing babai, kailangan yang pasakup lubus king sarili nang asawa.

Efeso 5:31,33 Antimo ing sasabian na ning kasulatan, “Uli na niti, lakuan ne ning lalaki ing tata na at ima at makiabe ya king asawa na, at ilang adua maging metung la.” 33 Oneng mangaintulid munaman iti kekayu: ikayung lalaki, luguran ye ing sarili yung asawa antimo ing lugud yu king kekayung sarili; babaes, igalang ye ing sarili yung asawa.

1 Corinto 7:3 Kailangan nang tuparan ning lalaki ing katungkuluan na bilang asawa king asawa na, at makanyan munaman ing babai.

1 Corinto 7:34 inya e na balu ing arapan na. Ing babaing e talasawa o birhen bukud nang papansinan ing obra na ning Ginu, uling buri na ing mitalaga ya king Dios ing katawan na at espiritu; oneng papansinan na la ning talasawang babai ding bage keti king yatu, uling buri neng paligayan ing asawa na.

Colosas 3:18 Ikayung babaing talasawa, pailalam kayu karing asawa yu uling ita ya ing kailangan yung daptan bilang Cristianu.

1 Timoteo 2:11-15 Kailangan lang tahimik makiramdam ding babai king oras na ning pamagaral at lubus lang pasakup. 12 E ke paintulutan ing babai ban turu o sumakup karing lalaki; kailangan ing manahimik ya. 13 E yu sa kakalinguan king i Adan ya ing minunang melalang bayu i Eva. 14 Aliwa i Adan nune i Eva ing melinlang at linabag king utus ning Dios. 15 Makanyan man, miligtas ya ing babai king uli na ning pamanganak na, nung manatili ya king kasalpantayanan, king lugud at kabanalan ampon kahinhinan.

Genesis 3:16 Ngana naman king babai, Dagdagan ku ing kasakitan mu king kekang pamanganak; king sakit ibait mu la ding anak mu. Makanyan man pagnasan me pa mu rin ing asawa mu at pailalam ka king upaya na.

1 Pedro 3:1,2 Makanyan munaman, ikayung babaing talasawa, pasakup kayu karing sarasarili yung asawa ban kanita nung ding aliwang lalaking talasawa e la pa maniwala king amanu na ning Dios, mayagkat la agyang e kayu magsalita king kapamilatan na ning ugali yu, 2 uling ila mismu akit da kekayu ing wagas at mayap a panugali.

Tito 2:1-5 Oneng ika sukat mung ituru ing panugaling aduan na ning mayap a doktrina. 2 Panabilinan mu la ding makatuang lalaki king e la maglasing, maging marangal la, at biasang mamigil king sarili, matatag king karelang pamanialpantaya, malugud, at mapibabata. 3 Antimu rin, panabilinan mu la ding makatuang babai ing manugali lang antimong babaing mabibie king kabanalan antimo ing sukat karela. E la mapanyirang puri at e magbisu king alak. Sukat dang ituru ing mayap 4 ban ayaralan da la ring kayanakan a babai at luguran da la ring karelang sarasariling asawa at anak; 5 biasang mamigil king sarili ra at malinis a pamibiebie, at maging mayap a mibalebale ampon biasang manusig karing karelang asawa. Ninuman kanita alang makapagsalita laban king amanung manibatan king Dios.

Kasebian 12:4 Ing mayap a babaing talasawa dangalan ne ning asawa na; nung makarine ing dapat na mengari yang sakit king butul na.

Kasebian 14:1 Ding biasang babai menalakad lang maligayang tuknangan, oneng malasak la uli ning kamangmangan.

Kasebian 19:13 Ing mangmang a penganak ya ing magdalang kasiran kang tata na, oneng ing asawang masalita mengari ya king danum a patak-patak.

Kasebian 21:9,19 Mas masanting ing manuknangan babo bubungan kesa king kilub ning bale a kayabe ning babaing madaldal. 19 Mas mayap ing manuknangan ka king libutad ning disyerto kesa king makiabe ka king asawang e patugut sasabi at magrekamu.

Kasebian 25:24 Mas mayap ing manuknangan king babo ning bale kesa king makitubale ka king babaing madaldal.

Kasebian 27:15,16 Ing asawang babaing masalita kalupa ne ning papatak a uran neng kauran. 16 Nung keka yang patuknangan mengari kang sasabat king angin o sasakmal king laru.

Kasebian 31:10-31 Masakit yang panintunan ing mayap a asawang babai! Maygit ya kaulaga kesa karing alahas a mangamat. 11 Lubus

yang tiwala ing asawa na at kapilan man e ya magkulangan karing bage maulaga. 12 Kabang bie na, susuyuan neng mayap ing asawa na; ala yang daraptan a e ustu. 13 E ya patugut magobra; gagawa yang imalan a lana at linen. 14 Mengari ya king barkung ating dakal a mangamal a kalakal; miyuyuli yang kabiayan a ibat king marayung lugal. 15 Ganingaldo pa mibabangun ne ban magsadiang pamangan para king pamilya na at ban gisingan na la at tutukan obra ding babaing kasaup da king bale. 16 Nung manakit yang gabun a masanting, saliwan ne at gawan neng pitamnanan ubas karing salaping keyang atipun. 17 Matatag ya king obra, masikan ya, at masipag. 18 Balu na king maulaga ing balang gagawan na, at e patugut magobra anggang kapitangan bengi. 19 Gagawa yang sarili nang sinulad at manayi yang sarili nang imalan. 20 Sasaupan na la ding kalulu at ding atyu king pamangailangan. 21 E ya migaganaka neng panaun na ning dimla uling atin lang imalan a pagmarimla ding keyang pamilya. 22 Gagawa yang ulas at mi-imalan yang mapinung linen a kule granati. 23 Pikabaluan ya ing asawa na at metung ya karing memalen a gagalangan. 24 Manayi ya pang imalan at babat at pisasali na karing maniali. 25 Marangal ya at kagalang-galang; ala yang takut marap king aldo bukas. 26 Magsalita ya king mitmung kabiasnan at maganaka ya. 27 Samal yang parati at lilingapan na ing kailangan na ning pibalebale na. 28 Pakamalan de at gagalangan ding anak na at pupurian ne ning asawa na. 29 Nganang magsalita ning asawa na, Dakal lang babaing talasawang mayap, oneng ika ing pekamayap karela ngan. 30 Mapaglinlang ing seksi, kukupas ing lagu, oneng ing babaing ating takut king Ginu sukat yang purian. 31 Pasalamatan ya at parangalan king sablang keyang daraptan. Karapatdapat neng purian ning balen.

**Pastor T. John Franklin
Church of Salvation, Healing, and Deliverance
COS-HAD.org**